



Amaran!

Pihak Jabatan Agama Islam Perak tidak bertanggungjawab terhadap sebarang penambahan ayat selain daripada kandungan khutbah yang dikeluarkan.

"HARGAI JASA DAN PENGORBANAN PAHLAWAN NEGARA"

26 Julai 2024 / 20 Muharram 1446

الْحَمْدُ لِلَّهِ¹ الَّذِي أَرْسَلَ رَسُولَهُ بِالْهُدَىٰ وَدِينِ الْحَقِّ، لِيُظْهِرَهُ عَلَى الدِّينِ كُلِّهِ وَكَفَىٰ بِاللَّهِ شَهِيدًا. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ² وَعَلَى آلِهِ وَأَصْحَابِهِ وَالتَّابِعِينَ لَهُمْ بِإِحْسَانٍ إِلَى يَوْمِ الدِّينِ. أَمَّا بَعْدُ، فَيَا عِبَادَ اللَّهِ! اتَّقُوا اللَّهَ³ أَوْصِيكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ.

Jemaah yang dirahmati Illahi,

Marilah kita tingkatkan keimanan dan ketakwaan ke hadrat Allah SWT dengan melaksanakan segala perintah dan menjauhi semua larangan Nya, mudah-mudahan kita mendapat kejayaan di dunia dan kebahagiaan di akhirat. Menjelang sambutan Hari Pahlawan, mimbar akan menyampaikan khutbah bertajuk: "HARGAI JASA DAN PENGORBANAN PAHLAWAN NEGARA"

Firman Allah SWT, ayat 95 surah An-Nisa:

﴿لَا يَسْتَوِي الْقَاعِدُونَ مِنَ الْمُؤْمِنِينَ غَيْرُ أُولِي الضَّرَرِ وَالْمُجَاهِدُونَ فِي سَبِيلِ اللَّهِ بِأَمْوَالِهِمْ وَأَنْفُسِهِمْ فَضَّلَ اللَّهُ الْمُجَاهِدِينَ بِأَمْوَالِهِمْ وَأَنْفُسِهِمْ عَلَى الْقَاعِدِينَ دَرَجَةً وَلَا وَعَدَ اللَّهُ الْحَسَنَىٰ وَفَضَّلَ اللَّهُ الْمُجَاهِدِينَ عَلَى الْقَاعِدِينَ أَجْرًا عَظِيمًا﴾

Bermaksud: Tidaklah sama keadaan orang beriman yang duduk (tidak turut berperang) daripada kalangan orang yang beriman selain daripada orang-orang yang ada keuzuran - dengan orang-orang yang berjihad (berjuang) di jalan Allah (untuk membela Islam) dengan harta dan jiwanya. Allah melebihkan darjat orang-orang yang berjuang dengan harta dan jiwa mereka berbanding orang-orang yang duduk (tidak turut berperang tanpa keuzuran) dengan kelebihan satu darjat. Dan, tiap-tiap satu (daripada dua golongan itu), Allah menjanjikan balasan yang baik (syurga), dan Allah melebihkan orang-orang yang

¹ Memuji Allah

² Selawat ke atas Nabi Muhammad SAW

³ Pesan Taqwa



berjuang berbanding orang-orang yang tinggal duduk (tidak turut berperang dan tiada sebarang keuzuran) dengan pahala yang amat besar.

Ayat 95 surah An-Nisa yang khatib bacakan, menunjukkan kelebihan darjat yang dikurniai oleh Allah SWT kepada orang-orang yang bersedia memenuhi tanggungjawab untuk berjuang di jalan Allah dengan harta dan jiwa. Di dalam Islam, berjuang demi memelihara keamanan, mengekalkan ketenteraman dan mempertahankan kedaulatan negara turut dianggap sebagai jihad. Sabda Rasulullah SAW:

رِبَاطُ يَوْمٍ وَلَيْلَةٍ خَيْرٌ مِنْ صِيَامِ شَهْرٍ وَقِيَامِهِ ، وَإِنْ مَاتَ جَرَى عَلَيْهِ عَمَلُهُ الَّذِي كَانَ
يَعْمَلُهُ ، وَأُجْرِي عَلَيْهِ رِزْقُهُ ، وَأَمِنَ مِنَ الْفِتَانِ

Bermaksud: Menjaga sempadan negara sehari semalam adalah lebih baik daripada berpuasa dan solat malam sebulan penuh. Bila penjaga tersebut meninggal dunia (ketika bertugas), dia akan terus diberikan pahala atas amalan yang biasa dilakukannya sebagaimana dia terus dikurniakan rezeki dan kenyamanan dari segala pengganggu (azab kubur).
(Hadis Riwayat Muslim)

Jemaah Rahimakumullah,

Keadaan negara yang aman dan tenteram hari ini, membolehkan ummah berasa selamat untuk menuntut ilmu di sekolah, di maktab atau di universiti; berasa selesa untuk berniaga, bekerja, berkebun, bersawah, ke laut dan ke bukit untuk mencari rezeki; berpergian dari tempat ke tempat untuk ziarah menziarahi, bercuti dan melancong menikmati keindahan alam dan tempat-tempat peranginan; begitu juga beriang ria pada hari-hari perayaan; juga mudah untuk beribadah ke surau dan masjid. Namun sedarilah! Keamanan, ketenteraman dan kedaulatan negara Malaysia, bukannya bulat datang bergolek – tidak juga pipis datang melayang.

Keamanan, ketenteraman dan kedaulatan negara yang ummah nikmati hari ini, ialah hasil daripada semangat juang – semangat kepahlawanan – semangat pengorbanan tinggi yang dimiliki oleh anggota pasukan keselamatan, terdiri daripada anggota Angkatan Tentera Malaysia bersama anggota Polis Diraja Malaysia. Mereka merupakan wira-wira negara yang mengabadikan jiwa dan raga sehingga ke peringkat sedia berkorban nyawa demi mempertahankan kedaulatan negara daripada ancaman musuh, di samping memastikan negara berada dalam keadaan aman dan tenteram.



Sebuah negara berdaulat perlu mewujudkan suasana aman dan tenteram. Kedaulatan sesebuah negara ditentukan oleh tahap keselamatan negara daripada ancaman dan serangan musuh luar. Nikmat kehidupan yang aman dan tenteram tidak mungkin wujud tanpa jaminan keselamatan. Tanggungjawab besar untuk menjaga keselamatan negara diamanahkan kepada Angkatan Tentera Malaysia, terdiri daripada Tentera Darat Diraja untuk mengawal keselamatan di darat terutama di sempadan, Tentera Laut Diraja untuk mengawal kawasan perairan dan Tentera Udara Diraja untuk mengawal ruang udara. Sementara tugas untuk menjamin keamanan dan ketenteraman awam diamanahkan kepada anggota Polis Diraja Malaysia.

Jemaah yang dilimpahi rahmat Ilahi,

Para anggota tentera dan polis telah dan sedang memenuhi tugas fardu kifayah yang sangat penting lagi mulia. Dalam memenuhi tugas mempertahankan kedaulatan dan keselamatan negara, serta memastikan keamanan dan ketenteraman, anggota tentera dan polis mengorbankan keselesaan diri, di samping berhadapan pelbagai ancaman dan risiko. Ramai yang cedera, ramai pula yang gugur, terkorban semasa menjalankan tugas, meninggalkan balu pada usia masih muda, anak-anak kecil menjadi yatim, serta ibu bapa yang sudah menjangkau usia. Mereka yang terkorban merupakan wira-wira bangsa yang gugur ketika mengabadikan jiwa raga berkhidmat untuk raja dan negara; dan ramai disemadikan di pusara yang tidak bernama.

Sambutan Hari Pahlawan diperkenalkan, bertujuan menghargai jasa dan bakti para pahlawan yang terdiri daripada anggota pasukan keselamatan yang terkorban semasa menggalas tanggungjawab fardu kifayah memelihara keamanan, mengekalkan ketenteraman dan mempertahankan kedaulatan negara. Di Malaysia, Hari Pahlawan disambut pada 31 Julai setiap tahun, mengambil sempena tarikh pengisytiharan tamatnya darurat pada 31 Julai 1960.

Jemaah yang dimuliakan,

Mimbar mengucapkan penghargaan yang setinggi-tingginya kepada setiap anggota tentera dan polis baik yang masih berkhidmat begitu juga yang telah bersara; dan menitip beberapa pesanan;



Pertama: Ummah mendoakan agar Allah SWT memberikan ketabahan, kecekalan dan keyakinan serta perlindungan kepada anggota pasukan keselamatan semasa menjalankan tugas; serta dilimpahi ke atas mereka, begitu juga ke atas keluarga mereka yang sama-sama berkorban, keberkatan hidup dan ganjaran yang besar di akhirat.

Kedua: Ummah menghargai khidmat para anggota keselamatan yang telah berkorban serta membuktikan kesetiaan yang tinggi kepada raja dan negara, dengan memberikan sokongan, pertolongan dan bantuan untuk memenuhi keperluan selepas mereka bersara, terutama dalam kalangan mereka yang cedera, cacat dan kehilangan anggota; demikian juga dihulurkan bantuan dan sokongan kepada anggota keluarga mereka terutama para balu yang kehilangan suami, serta anak-anak yang menjadi yatim.

Ketiga: Ummah bermurah hati menghulurkan sumbangan dan derma ke Tabung Pahlawan; termasuk dipertimbangkan sebahagian daripada kutipan tabung masjid pada hari ini disumbangkan ke Tabung Pahlawan.

بَارَكَ اللَّهُ لِي وَلَكُمْ بِالْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.

Khutbah Kedua

الْحَمْدُ لِلَّهِ⁴ حَمْدًا كَثِيرًا طَيِّبًا مُبَارَكًا فِيهِ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ
أَنَّ سَيِّدَنَا مُحَمَّدًا عَبْدَهُ وَرَسُولَهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ⁵ وَعَلَى آلِهِ وَأَصْحَابِهِ
أَجْمَعِينَ. أَمَّا بَعْدُ، فَيَا عِبَادَ اللَّهِ! اتَّقُوا اللَّهَ⁶ وَكُونُوا مَعَ الصَّادِقِينَ.

Muslimin yang dirahmati Allah,

Mimbar menyeru para jemaah agar tetap berpegang kepada aqidah Islamiah berteraskan Ahli Sunnah Waljamaah, yang menjadi warisan Rasulullah SAW, sahabat dan tabiin serta yang mengikutinya dari kalangan Asyairah Maturidiah. Jagalah hubungan dengan Allah SWT dan sesama manusia. Makmurkan rumah-rumah Allah dengan istiqamah mengerjakan ibadah, terutama solat fardu berjemaah. Perbanyakkan selawat dan salam ke atas Junjungan Besar Nabi Muhammad SAW.

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا⁷
اللَّهُمَّ صَلِّ عَلَى مُحَمَّدٍ وَعَلَى آلِ مُحَمَّدٍ كَمَا صَلَّيْتَ عَلَى إِبْرَاهِيمَ وَعَلَى آلِ إِبْرَاهِيمَ وَبَارِكْ عَلَى
مُحَمَّدٍ وَعَلَى آلِ مُحَمَّدٍ كَمَا بَارَكْتَ عَلَى إِبْرَاهِيمَ وَعَلَى آلِ إِبْرَاهِيمَ فِي الْعَالَمِينَ إِنَّكَ حَمِيدٌ
مَجِيدٌ. اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ، وَأَصْلِحْ ذَاتَ بَيْنِهِمْ
وَأَلْفَ بَيْنَ قُلُوبِهِمْ وَاجْعَلْ فِي قُلُوبِهِمُ الْإِيمَانَ وَالْحِكْمَةَ، وَثَبِّتْهُمْ عَلَى مِلَّةِ رَسُولِ اللَّهِ ﷺ.
اللَّهُمَّ أَعِزِّ الْإِسْلَامَ وَالْمُسْلِمِينَ وَاَنْصُرْ إِخْوَانَنَا وَأَخَوَاتِنَا وَأَطْفَالَنَا فِي فَلَسْطِينَ، وَاحْفَظْ
أَهْلَهَا وَاَنْصُرْ جُودَهَا وَدَمِّرْ أَعْدَانِكَ أَعْدَاءَ الدِّينِ يَا رَبَّ الْعَالَمِينَ.

Ya Allah! Ya Rabbal 'alamin Lindungi keselamatan para anggota tentera dan polis ketika menunaikan fardu kifayah mempertahankan kedaulatan negara, serta memulihara keamanan dan ketenteraman. Limpahi rahmat dan ihsan Mu kepada roh para pahlawan kami yang terkorban ketika menyempurnakan tugas, tempatkan roh-roh mereka yang terkorban dalam kalangan roh para Solihin dan Solehah, tenang di alam barzakh,

⁴ Memuji Allah

⁵ Selawat ke atas Nabi Muhammad SAW

⁶ Pesan Taqwa

⁷ Ayat Al-Quran

⁸ Doa untuk Kaum Muslimin



dipermudahkan pertimbangan di Padang Mahsyar dan ditempatkan mereka dalam syurga Mu. Tabahkan hati, kurniai kekuatan dan ringankan tanggungan hidup dan dimurahkan rezeki Mu kepada anggota keluarga mereka yang telah kehilangan anak, suami, isteri, ayah atau ibu.

Ya Mannan! Ya Razzaq!, berkatilah hamba Mu yang melaksanakan zakat, wakaf dan sedekah. Kurniai mereka rezeki yang berlipat ganda, serta sucikanlah harta dan jiwa mereka; jauhi golongan *fuqara* dan *masakin* daripada kekufuran dan kefakiran yang berpanjangan.

Ya Aziz! Ya Qahhar! Lindungi Masjid al-Aqsa daripada dimusnahkan oleh rejim Zionis Israel dan limpahi ihsan Mu membela dan mengurniakan kemenangan kepada rakyat di bumi Palestin yang sedang menderita kerana perbuatan zalim rejim Zionis Israel.

Ya Mu'min! Ya Muhaimin! Limpahi rahmat Mu agar negara kami berada dalam keadaan selamat dan makmur, dijauhi daripada bencana dan malapetaka, rakyatnya hidup dalam suasana aman dan muhibah.

Ya Maalikal Mulk!, jauhi negara kami daripada kehancuran disebabkan perbuatan rasuah; serahkan tanggungjawab pimpinan dan pengurusan negara kami kepada kalangan hamba Mu yang amanah dan ikhlas, serta tegas lagi berani menegakkan kebenaran dan melaksanakan keadilan berlandaskan hukum.

Ya Malik! Ya Hadi!, kurniakanlah taufik dan hidayah Mu terhadap raja kami, Duli Yang Maha Mulia Paduka Seri Sultan Perak Darul Ridzuan, Sultan Nazrin Muizzuddin Shah Ibni Almarhum Sultan Azlan Muhibuddin Shah Al-Maghfur-Lah, dan Raja Permaisuri Perak Darul Ridzuan Tuanku Zara Salim serta kerabat diraja dan seluruh rakyat jelata.

رَبَّنَا إِنَّا فِي الدُّنْيَا حَسَنَةٌ وَفِي الآخِرَةِ حَسَنَةٌ وَقِنَا عَذَابَ النَّارِ
عِبَادَ اللَّهِ، ﴿إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَىٰ وَيَنْهَىٰ عَنِ
الْفَحْشَاءِ وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ﴾ فَادْكُرُوا اللَّهَ الْعَظِيمَ يَذْكُرْكُمْ،
وَاشْكُرُوا عَلَىٰ نِعْمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ، وَلَذِكْرُ اللَّهِ أَكْبَرُ، وَاللَّهُ يَعْلَمُ
مَا تَصْنَعُونَ.